

Ba ba tlo go lahlwa ke bo-mang?

Batho ba bantši ga ba nyake go nagana taba ye, ka gobane ba boifa go tseba se se lego nnete mabapi le dihele. (Sekoti sa mollo). Ba tšhaba go bona ge bona beng ba theogela diheleng ka lebelo. Bontši bja batho ba leka go homotša letswalo la bona ka mantšu a a latelago. Ba re: “Modimo ke Modimo wa lerato, a ka se ke a lahla motho diheleng.” Ka go realo ba gopola gore taba ya bophelo bjo bo sa felego bja bona e šetše e lokišitšwe, ‘me ba re bophelo bja bona bja sebe bo tlo amogelwa legodimong. “A ga le tsebe gobane ba ba sa lokago ba ka se be le kabelo mmušong wa Modimo? Lesang go iphora: Ba diotswa, le ba medimo e šele, le bahladi le dihlotlolo, le ba go dira ditšhila le banna ka bona, le mahodu, le ba megabaru, le mata-gwa, le ba maroga, le bahlakodi, ba ba bjalo ga ba na kabelo mmušong wa Modimo.” (1 Ba-Korinthe 6:9-10). “Go ka se ke gwa tsena se se nyatšegago le e a dirago tša bohlole le maaka. Go tlo tsena ba ba ngwadilwego mo pukung ya bophelo bja Kwana.” (Kutollo 21:27).

Ba bangwe ba leka go re bontšha gore dihele ga di go. Sehlopha se sengwe sa batho se na le thuto enngwe ye e dirilwego ke motho. Ba re: Ka morago ga lehu motho o hlwekišwa ke mollo ke mo a kgonago go tsena legodimong. Go a makatša go bona ka mo batho ba lekago go tšhaba taba ya nnete ya dihele. Ba bangwe ba e efoša ka go re: “Ga go na bophelo ka morago ga lehu, ge re hwile ke moka, ga go na selo mošola wa lebitla.” Lentšu la Modimo le re: “Gomme ka ge batho ba beetšwe go hwa ga tee, gwa kgona go tla kahlolo.” (Ba-Heberu 9:27). Sehlopha se sengwe sa batho ba

lefase ba kgolwa gore bao ba ba tlo go tsoga bahung ke bao ba ba hwilego e le bakreste; ba bangwe ba hwa, ke mafelelo. Ba bantši kudu mafaseng a mantši ba na le tumelo ya go re ge motho a hwile o tlo boyela gape lefaseng, a le letšoba, goba kgomo, goba noga, goba phoofolo enngwe le ge e le sephedi se sengwe. Maaka, a batho ba iphorago ka ona mabapi le dihele ke a mantši ka kudu.

A DIHELE DI GONA NA?

Yo re ka go mo dumela, ka gobane o rereša go phala batho ka moka, ke Morena Jesu. Yena o boletše kudu ka taba ya dihele. Re tlo ntšha ditemana tše di sego nene Lentšung la Modimo, re bone se a se boletago. “E a rego: Setlaela! a e-ra ngwanabo, o swanetšwe ke molete wa dihele.” (Mateo 5:22). “Ke gona-ge, ge o kgopišwa ke leihlo la gago le letona le gonye o le lahle; gobane se se tlo go go hola, ke ge se sengwe sa ditho tša gago se senyega, gore mmele wa gago ka moka o se tlo lahlwa moleteng wa mollo. Ge o kgopišwa ke seatla sa gago sa le letona, se ripe o se lahle kgole, gobane se se tlo go go hola

ke ge se sengwe sa ditho tša gago se senyega, gore mmele wa gago ka moka o se tlo lahlwa moleteng wa mollo.” (Mateo 5:29-30). “‘Me barwa ba mmušo ba tlo ntšhetšwa ntle lefsifising la ntle-ntle. Gona-moo go tlo ba le dilo le ditsikitlano tša meno.” (Mateo 8:12). “Le se boife ba ba bolayago mmele, ba sa kgone go bolaya moya; gagolo le boife yo a kgonago go senya mmele la moya moleteng wa mollo.” (Mateo 10:28). “Le wene Kaperenaume, o phagamišitšwe wa goma ka



legodimo; 'me o tlo theošetšwa kwa bo-dula-bahu; gobane ditiro tše matla tše di dirilwego go wene, ge e ka be di dirilwe motseng wa Sodoma, o ka be o sa le gona le lehono." (Mateo 11:23). "Bjaloka mefoka ge e kgobelwa ya fišwa ka mollo, le bofelong bja lebaka leno go tlo ba bjalo. Morwamotho o tlo roma barongwa ba gagwe, ba yo hlaola dikgopišo ka moka ba di ntšha mmušong wa gagwe, ba hlaola ba-dira-bokgopo. 'Me ba tlo ba lahlela sebešong sa mollo, mo go tlo ba le dillo le ditsikitlano tša meno. Go tlo ba bjalo bofelong bja lebaka leno. Barongwa ba tlo tšwa ba hlaola ba babe mo gare ga ba ba lokilego. "Me ba tlo ba lahlela sebešong sa mollo, mo go tlo ba le dillo le ditsikitlano tša meno." (Mateo 13:40-42, 49-50). "Kgoši ya mmotšiša ya re: Mogwer'aka, o tsene bja mono o s'a apara seaparo sa monyanya? Motho yo a homola. Kgoši ya botša bahlanka ya re: Mo tlemeng maoto le matsogo le mo ntšetše lefsifising la kwa ntle-ntle mo go tlo ba le dillo le ditsikitlano tša meno." (Mateo 22:12-13). "Hee lena dinoga matswinyana a marabe, kahlolo ya go tlo le iša moleteng wa mollo le tlo e phonyokga bjang?" (Mateo 23:33). "'Me bona ba tlo ya tlhokofatšong ye e sa felego; baloki bona ba tlo ya bophelong bjo bo sa felego." (Mateo 25:46). Mangwalo a ke a mangwe a a tšwago pukung e tee ya Baibele fela. A mangwe a mantši a sa le gona.

MOLETE WA MOLLO KE O MOBJANG ?

Ka letšatši le lengwe Jesu a tloša seširo gore re kgone go hlodimela. Mo go Luka 16:19-31 Jesu o re file seswantšho sa se molete wa mollo o lego sona. O re šupa tše šiišago, tše leihlo la motho le s'ešogo la di bona. Re bona mollo wa dihele wo o tukago, 'me bodibeng bjo bogolo bja mollo go na le motho. Monna yo ga a robale, o phafogile, o a phela. O tseba se se diregago kgaufsi le yena. O kgona go bona, o kgona go utlwa, leleme la gagwe le kgona go kwa. Monna yo o be a phela mono lefaseng, a tsamaya go lona, ka mo le rena re dirago gona bjale. O be a kwile Lentšu la Modimo goba baporofeta, ka mo le rena re ba kwago. Ga se a theeletša se Moše le baporofeta ba se bolelago, a ba bjalo batho ba bantši mo gare ga rena lehono, ba ba sa rego selo ka Lentšu la Modimo le baboledi ba lona. Monna yo ga a ka a gopola selo, ga se a itshwenya mabapi le bophelo bjo bo lego gona ka morago ga lehu. Ka nako enngwe o bile le mogopolo wa go re: Modimo ke Modimo e a lokilego, a ka se mo lahle diheleng, le ge a ka fihla gona, baperisita ba tlo kgona go mo ntšha ka dithapelo. Eupša o ile a fihla diheleng, gomme re mmona a le kgabong ya mollo.

Mo lebelele, o bone madimabe sefahlogong sa gagwe, o hlokomele poifo ya yo a hlokago tshepo ye e bonagalago mahlong a gagwe, theeletša selo se se tšhošago sa gagwe ge a goelela Tate

Aborahama a re: "Aborahama Tata! Nkgaogele! Roma Latsaro a ine ntlha ya monwana meetseng, a tle a ntime leleme; gobane ke kwa bohloko mo kgabong ye.... Gona Tata, ke a go rapela, mo rome a ye ngwakong wa tate; gobane ke na le bana bešo ba bahlano, a y'o ba hlatsela, gore ba se ke ba tla le bona madulong a a bohloko." Tata Aborahama a fetola a re: "Ba na le Moše le baporofeta, a ba kwe bona." Eupša monna yo a lego kgabong ya dihele a re: "E ka re ge e mongwe wa ba ba hwilego a e-ya go bona ba ka theeletša." Aborahama a fetola a re: Ge ba sa kwe baporofeta, ba ka se ke ba kwa le ge go ka tsoga e a tšowago bahung." Ke ba ba kae ba ba bego ba le bagwera ba rena goba meloko, ba ba lego bohlokong mellong ya dihele? Ba ka rata go boya ba re eletše mabapi le bommannete bja molete wa mollo, fela ga ba kgone go boya. Re na le Lentšu la Modimo, re swanetše go dumela lona Jesu o ile a tsoga bahung 'me ba ba mo dumetšego e be e le ba bakae? Ba ba sego nene.

Mahloko moletteng wa mollo ga se a sebakanyana fela, ke a neng le neng. "Tlogang fa go nna, lena balahlwa, le ye mollong o sa felego." (Mateo 25:41). "'Me Diabolo wa go ba fora a lahlelwa bodibeng bja mollo le tshebela, ...o tlo tlaišwa mosegare le bošego go iša mehleng ya neng le neng. Le e a sa kago a hwetšwa a ngwadilwe pukung ya bophelo, a lahlelwa moo bodibeng bja mollo." (Kutollo 20:10-15). "Mo seboko sa bona se sa hwego, mo mollo o sa timego." (Mareka 9:48).

Molete wa mollo ke felo ga tlhokofatšo le mahloko. Baibele e re botša e re: Go tlo ba le dillo le ditsikitlano tša meno. Mollo o kwša bohloko. Batho ba ka se lle ba tsikitlana meno ge go ka be go se na bophelo ka morago ga lehu, ka mo ba bangwe ba holofelago ka gona. Bophelo ka morago ga lehu bo gona, ka gobane re bala mo go Kutollo 20:12, "Ka bona bahu ba eme pele ga Modimo, ba banyane le ba bagolo." Ge re ka lahlelwa diheleng re tlo dula gona go iša go sa felego re hlokofatšwa ke mollo wa tšona.

BA BA YAGO MOLETENG WA MOLLO KE BO-MANG ?

Molete wa mollo o lokišeditšwe Satane le barongwa ba gagwe. Bohle ba ba dirago dibe, ba ba theeletšago lentšu la Satana, bao maina a bona a sego pukung ya bophelo, le bona ba tlo ya felo fao ga tahlego. (Mateo 25:4). Kutollo 20:15). Ke gore ke batho ka moka, gammogo le wena le nna. "Ba dirile dibe bohle, ba hlaelelwa ke letago la Modimo." (Ba-Roma 3:23). "Ke gona, bjalo ka ge sebe se tsene lefaseng ka motho o tee (Adama) 'me lehu la tsena ka sebe, lehu le aparetše batho bohle ka ge ba dirile dibe bohle." (Ba-Roma 5:12). Ka baka la sebe sa Adama, lehu

le tletše bohle, le wena le nna re swanetše go hwa. Ka yona tsela ye, sebe se tšile go rena, gomme mahlong a Modimo re badiradibe ka moka ga rena. Re na le tlhago ya sebe le tumo ya go dira dibe, re sa theeletše Modimo. Ga go nyakege gore motho a rutišwe go dira dibe, o dio dira yena mong. Eupša batho ba swanetše go rutišwa go theeletša Modimo le go mo direla. Ka baka la sebe se se tletšego batho bohle, rena ka moka re hlaelwa ke letago la Modimo, re leba diheleng. Le ge re ka rata go tseba taba ye, goba re sa rate, re theogela diheleng tše šiišago.

Batho ba bantši ba rapela ba re: "Morena, Morena," ba bolela ditemana le dithapelo tše di ngwadilwego ke batho, eupša Morena ga ba mo tsebe e le mophološi wa bona, ga ba ka ba tswalwa ka bofsa. Le bona ba tlo ba diheleng. (Mateo 7:21-23). Ba bangwe ba re ke bona bakretse, eupša ga ba enywe dikenya tše di lokilego. Le bona ba tlo lahlelwa mollong. Mediro ya nama ye e sa swanelago go khumanwa go rena ke "tlhalo, le bootswa, le ditšhila, le bohlotlolo. Ke go hlankela medimo, le boloi, le tlhoyano le dintwa, le pefelo, le bogale, le ditšhele le bogaregare, ke mona, le polao, le botagwa, le bohor, le tše di swanago le tše, tše ke felago ke le botša bjalo ka ge ke le boditše kgale ka re: Ba ba dirago tše bjalo baka se je bohwa mmušong wa Modimo." (Ba-Galata 5:19-21). Ge re ipitša bakretse, se lefase le swanetšego go se bona mo go rena ke "lerato, le lethabo, le molao; ke go se fele pelo, le botho, le bonolo, le potego, le boleta le boitshwano." (Ba-Galata 5:22-24). Ba ba tlo go ba gona moleteng wa mollo, ke bao ba ba sa kago ba hlatswa ka madi a bohlokwa a Jesu, ba ba sa kago ba sokologa dibeng tša bona, ba ba sa kago ba amogela neo ya Modimo ye e lego bophelo bjo bo sa felego le bao ba ba gatago madi a Jesu ka maoto ka baka la go se kwe ga bona.

Morena o ile a bolela le Nikodemo, yo a bego a le moruti, a mmošša a re: "Ge motho e se wa go tswalwa lefa, a ka se ke a bona mmušo wa Modimo." (Johane 3:3). Morena o ile a mo hlaloseša gore le ge e le yena moruti, monna yo a lokilego, a ka se ke a tsena legodimong kantle ga go tswalwa la bobedi. Ge re sa tswalwa la bobedi re tlo ya diheleng le ge bophelo bja rena bo lokile.

"A le re kotlo e tlo ba e nyenyane ye e tlo go wela motho, e a gataketšego Morwa wa Modimo ka maoto, madi a kgwerano a go mo dira mokgethwa a re ga se selo, a nyatša Moya wa kgaogelo? Rena re tseba e a boletšego a re: Tefetšo ke ya-ka! O r'yalo Morena. A buša a re: Morena o tlo ahlolola setšhaba sa gagwe. Go wela diatleng tša Modimo e a phelago go a šiiša." (Ba-Heberu 10:29-31).

KE MANG YO A RE ROMELAGO DIHELENG ?

Batho ba bantši ba re: Ka ge Modimo a le lerato, a ka se ke a re lahlela moleteng wa mollo. Bjale go direga bjang gore batho ba ye gona? Modimo, ka lerato la gagwe le legolo, o re lokišeditše tsela ya go phonyokga, gomme e mongwe le e mongwe o kgona go ikemišetša yena mong, mo a ratago go ba gona go iša go sa felego. Modimo o tlogetše kgetho ye go wena le nna, re lokologile go ikgethela legodimo goba molete wa mollo. Ge re nyaka go ya legodimong, re bontšhwa tsela ye e yago gona gabotse. Ge re ka nyatša tsela ya phološo ya Modimo goba ge re e galala, re tle re ipshine ka menate ya sebe sebakanyana, ke gona re ithomelago diheleng, ka gobane ke yona tsela ya go ya gona. Wena le nna re bontšhitšwe ditsela, ye e yago legodimong le ye e yago diheleng, eupša go kgetha ga ditsela le go tsamaya ka ye re ikgethetšego yona go fihla mafelelong a yona, go mo go wena le nna.

RE TLO PHONYOKGA BJANG ?

Modimo o re diretše tsela ya go phonyokga, ye e sa nyakego tšhelete, (ye e sa rekwego) ye e sa nyakego thuto e phagamilego, ye e sa nyakego gore o be le bophelo bjo bo lokilego pele o s'ešo wa e amogela, ye e sa kgopelego gore o e berekele. Tsela ya Modimo e fiwa feela, ke ya modiradibe yo mobe le ya yo a lokilego. Ngwana e a se nang thuto o kgona go e kwišiša, 'me a ka e amogela, ka mo motho yo mogolo a e kwišišago a e amogelago. Ke tsela e makatšang, ya letago. E tliša khutšo le lethabo. Tsela ya Modimo e rola morwalo wa sebe wo o imelago magetleng a rena, gomme yoko ya Modimo ga e robe, morwalo wa gagwe ke o bohwele. (Mateo 11:29-30).

Tsela ya Modimo ke go itshola le go sokologa dibeng tša rena. Re swanetše go nyama ruri ka baka la dibe tše re di dirilego, re sokologe go tšona. "Bjale gona ke thabile... ke thabela nyamo ya go le iša tshokologong.... Gobane nyamo ye Modimo a e ratago e tliša tshokologo e išago phologong." (2 Ba-Korinthe 7:9,10). "Napang le enywe dienywa tše di amanago le tshokologo." (Mateo 3:8). "Ke a le botša, ka mokgwa o bjalo kwa legodimong lethabo ka modiradibe o tee e a sokologago e tlo ba le le fetago la ge go thabelwa ba masome a senyane a metšo a senyane ba ba sa nyakego tshokologo." (Luka 15:7). "Mangwalo a re Krete o tlo tlišwa, a tlo tsoga bahung ka letšatši la boraro. Gore ditšhabeng ka moka ka leina la gagwe go tsebatšwe tshokologo le go lebaelwa dibe." (Luka 24:46-47). "Botho bja Modimo bo go otelela go itshola." (Ba-Roma 2:4). Ge re bontšhitšwe bogolo bja sebe sa rena ke Moya o Mokgethwa gomme re itshola, re sokologa, ke mo re swanetšego go ipolela dibe tša rena go Jesu, ka gore "ge re

ipolela dibe tša rena, gona ka ge yena e le wa potego le toko, o re lebelela dibe a re hlatswa bokgopo ka moka.” (1 Johane 1:9).

Re swanetše go dumela le go amogela ka tumelo seo Jesu a re diretšego sona. “Gomme bjalo ka ge Moše a fegile noga kwa lešokeng, Morwamotho le yena o tlo fegwa ka mokgwa woo. Gore mang le mang e a mo dumelago a se lahlege; a upye a be le bophelo bjo bo sa felego. Gobane Modimo o ratile lefase gakaakaa, a ba a le nea Morwa wa gagwe e a tswetšego a nnoši, gore mang le mang e a mo dumetšego a se ke a lahlega, a be le bophelo bjo bo sa felego. Gobane Modimo, Morwa wa gagwe ga a ka a mo romela lefaseng gore a le ahlole; o mo romile gore lefase le phološwe ke yena. E a mo dumetšego a ka se ke a lahlwa. E a sa dumelego, yena o šetše a tšwilwe, gobane a sa ka a dumela Leina la Morwa mo-tshwalwa-esi wa Modimo. E a dumelago Morwa, o na le bophelo bjo bo sa felego. E a sa mo dumelego, a ka se ke a ba a bo bona; se se tlo go dula se mo okametše ke bogale bja Modimo.” (Johane 3:14-18, 36). “Ruri, ruri ke a le botša, e a kwago se ke se bolelago a dumela e a nthomilego, o na le bophelo bjo bo sa felego, a ka se ke a tsena kahlolong; O tlogile lehung a selela bophelong.” (Johane 5:24). “Le baphološwa ka kgaogelo ka tumelo; ga l’a ka la iphološa; e fo ba mpho ya Modimo.” (Ba-Efeso 2:8). Ka baka la sebe sa Adama, lehu le sebe di tletše batho bohle, eupša ka gobane Jesu, Morwa wa Modimo, yo a se nago sebe, o re hwetše, re ka ba le bophelo bjo bo sa felego. “Bjale ka ge bohle ba e-hwa ka Adama, ba tlo phedišwa bohle ka Krete.” (1 Ba-Korinthe 15:22).

Le a bona, se re swanetšego go se dira ke selo se se nyane fela, ga se ntšhetšwe tšhelete. Re swanetše go sokologa, go ipolela, go dumela le go amogela Jesu Krete a be Morena le Mopholeši wa rena. Yo a re lefelago, a re fago tšohle ke yena Jesu. O lefetše phološo ya rena ka bophelo bja gagwe sefapanong sa Kolkotha. O hlatswa dipelo tša rena ka madi a bohlekwa a gagwe, o re lebelela dibe tše ntši tša rena, o re fa matla a go ba bana ba Modimo. O re

amogela a re dira ba gagwe. Phološo ye Jesu a re fago yona ke ye e makatšago, ya letago. e fiwa feela. O ka se amogele phološo ye le yena Jesu gona bjale na? Ka letšatši le lengwe monna wa mohetene a leka go kgodiša mokreste, gore bodumedi bja gagwe ke bja lefeela, bo ka se mo thuše selo. Mohetene a betšiša a re: “Jesu wa gago o go diretšeng?”

Mokreste a fetola a re: “O mphološitše.”

Mohetene a botšiša a re: “Ke eng?” Sefahlogo sa gagwe se be se šupa go se dumele. Mokreste a re: “E-tla le nna gore ke go bontšhe.” Ba tšwa ntlong. Mokreste a kgobokanya mahlare a a omilego a dira lešaka ka ona. A nyaka seboko a se bea ka gare ga lešaka la mahlare. A tšea mollo a tšuba mahlare a a dikologilego seboko. Mohetene a lebelela a maketše. Ge phišo ya mollo e fihlela seboko sa batho, sa thoma go minyekana le go thebologa, se šupa go tšhoga, eupša sa palelwa go tšwa lešakeng la mollo. Bjale mokreste a iša seatla mollong a ntšha seboko a se phološa, a se bea bjanyeng bjo bo tala, kgele le mollo le lehu.

Mokreste a re: “Se, ke se Jesu a ntiretšego sona. Ke be ke dikelogetšwe ke malakabe a mollo wa dihele ke be ke sa kgone go phonyokga. Ke be ke le modiradibe o mogolo, ke ahletšwe, ke le yo a letetšego lehu, eupša Jesu a mphološa ka go hwela dibe tša ka, a nkubula mollong.”

Mogwer’aka, ge o le tseleng ye e theogelago mollong wa dihele, o ka se lelalele go Jesu na? Sokologa, o ipolele dibe tša gago go yena, o mo dumele, o mo amogele gore a go phološe. O se ke wa diega, mo amogele gona bjale! Mo o leng gona, botša Jesu tšohle tše di lego pelong ya gago. O a go rata. Ga a nyake gore o hwe, o nyaka go go phološa, e bile o letetše selo sa gago. Mmitše. Yena o tlo otlolla seatla sa gagwe se se phutšwego ka dipikiri ka baka la rena, o tlo go topa a go ntšhe kotsing, a go bee bjanyeng bjo bo tala, kgole le tahlego ye a sa felego. O tlo go bea tseleng ye e tlo go go iša legodimong. Mo tshepe bjale!

M.R. Gschwend.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

For **free** Gospel literature, books and tracts in over 540 languages, write to:
EMAIL: info@angp.co.za

ALL NATIONS GOSPEL PUBLISHERS
P.O. Box 2191, PRETORIA, 0001, R.S.A.

(A Gospel Literature Mission financed by donations)
(Reg. No. 1961/001798/08)